

AKPA UTIBE-ŃKPO JESUS YE EDINAM ITIE-UKPONO-ABASI ASANA

John 2:1-25

QYQHỌ UKPEP-ŃKPO 28

Eke Mkparawa

IKỌ IBUOT: “Ufok Mi eyekere ete, ufok akam kpukpru mme idut” (Mark 11:17).

Okoñ Akan Owo

Utom Jesus Qboñ nnyin ke otu mme owo okotofio ke ini Enye ayararede utibe odudu Esie owut mme owo. Enye ama owut ete ke Imo imokoñ ikan owo emi idide ndidu uwem nte uwut ñkpọ nno mmọ efen. Nte nnyin ikekpepde ke ukpep-ñkpọ emi ekebede, Jesus ekedi ukem ye Abasi ke eribot ererimbot. Se Enye ekenyenede ndinam ekedi nditiñ ikọ, ndien ererimbot odu. Ke erida ndomo, ekedi ekpri ñkpọ onọ Eyen Abasi ndinam mmọñ akabare edi wine, edi kpa ukem odudu Abasi emi ke ekeda enam utibe-ñkpọ.

Tiñ Nọ Jesus

Ema ekot Jesus usoro ndo, ndien Enye ama asana ye eka Esie ye mbet Esie aka. Nte ido ekedide, ema enam usoro ke ini ema ekekure edinam ndo. Ke ekpri ini ama ekebe, wine ama ekpere ndikure, ndien ke ini Mary okopde, enye okodoho Jesus, ete, “Mmọ inyenekere wine.” Ke ini nnyin inanade ñkpọ edi eti ñkpọ nditiñ nno Jesus. Jesus inemke esit ke ini ndito Esie esemedede koro mmọ minyenekere kpukpru se mmọ eyomde. Enye okodoho ete ke Imo imofio se nnyin inanade, ndien edieke nnyin ibefede ke mbuotidem Imo iyenọ nnyin ñkpọ oro. Ntre edieke nnyin idude ke unana, mme ke afanikoñ, nnyin inyene nditiñ mmọ nno Jesus; ndien edieke okutde ete ke edi se ifonde nnyin ndinyene, Jesus eyeno.

Nnyin ifioke adaña nte Mary ye Jesus ekenemedede ebaña akpaniko emi ete ke Jesus okpuhore ye mme owo efen, edi Edisana Spirit ama etiñ onọ Mary mbemiso Jesus amana ete ke edikot Enye Eyen Andikoñ-ñkan, ke edi Enye edinyaña ikot Esie osio ke mme idiok-ñkpọ mmọ, ñko ke Uboñ Esie idinyuñ ikureke. Enye ama “omum kpukpru ñkpọ emi akama, onyuñ ekere mmọ ke esit esie” (Luke 2:19). Idahemi enye onim ke akpaniko ete ke Jesus enyene odudu ndinam kpukpru ñkpọ, onyuñ ekeme ndiñwam etubom usoro oro nsio ke mfina.

Oyoho Nsukibuot

Mary okodoho mme asanutom ete enam se ededi eke Jesus edidohode mmọ enam. Oro edi ndibe usuñ ndida mbọ mme edidiñ nto Jehovah. Jesus oyom nnyin itiene Enye ke ata ukem ido oro Enye etemedede nnyin ke Iko Esie. Baba usuñ efen iduhe ndida mbọ erinyaña ke ebede nditiene Jesus ye erikabare esit ñkpọñ mme idiok-ñkpọ, ndisin mmọ, ndinyuñ nnim Enye ke akpaniko kpa nte Edisana Nwed Abasi odohode. Ke ini mme Anditiene-Christ eyomde ñkpọ eto Abasi, mmọ enyene ndidi ye oyoho ediyak idem nno, enyime, ndinam se Enye oyomde mmọ enam. Ndien eno mmọ utip.

Ke ini Jesus odohode nnyin inam ñkpọ, Enye odori enyin ndikut nte nnyin inamde enye. Nsoñ-ibuot esida afanikoñ osok owo, kpa nte akanamde ye Jonah ke adañaemi Abasi okodohode enye aka okokworo ikọ onọ idiok obio Nineveh ete ke eyesobo enye, Enye ikoyomke ndika, ntre enye ama oduk ke ubom emi akade usuñ eñwen, man odomo ndifehe ñkpọñ iso Abasi. Edi nnyin ikemeke ndifehe ñkpọñ iso Abasi.

Okposon oyobio ama otibe, ndien mbufut mmọñ eberi ubom akanare tutu mme awat-ubom ekere ete mme imo imoñ ideñ. Jonah ama ofio ndien ete ke idiok-ñkpọ imo ama oyom imo okut, ntre enye ama odoho mme owo oro ete esio imo esin ke mmọñ ndien oyobio eyetre. Abasi ama onim akamba iyak kiet ete emen Jonah esin ke idibi, ke ntre enye ikakpaha ke mmọñ. Abasi okosuk okokut enye ke ata ntotuñ esit inyañ, ke idibi iyak oro, onyuñ obup enye mme onyime ndika idahemi. Ke uwemeyo ita ye okoneyo ita ema ekebe, Jonah ama onyime ndinam uyo Abasi nnyuñ ñka ñkokworo ikọ nno mbiobio Nineveh.

Ndusuk, Abasi idaha okposon ubok ntre itunọ nnyin, edi edi ata ñkpọ ndik ndison ibuot ye Abasi, nnyin inyuñ ikemeke ndibọ edidiñ Esie edieke inamde oro.

Mbeñe-idem Mbemiso Edidiñ

Ekedi mmem-mmem ñkpọ Jesus ndikpodoho ete, “Yak wine odu,” ndien wine okpokodu. Edi ndusuk ini Abasi oyom nnyin ibem iso inam ñkpọ. Ke ediwak idaha, Jesus ekedikok mme owo udofio ke ndidoho ete, “Sana,” mme “Daha ke enyoñ, men mbri fo, saña;” edi ini kiet ke ini Enye okokde owo nnan, Enye ekebem iso anam mbat otuk owo oro ke enyin, onyuñ odoho enye ete aka ke mkpodiho-mmọñ Siloam ekeyere. Ke ini owo nnan anamde uyo oro, enyin esie ama atara, ndien enye ama okut usuñ.

Ke ini nnyin itienede Jesus man Enye anam nnyin isana, mme iyomde ndibọ uduọk-mmọñ Edisana Spirit, Abasi oyom nnyin iyak idem ata ntọtụñ-ntọtụñ. Ndsuk ini ediyak idem oro ọwọrọ ata eriwa idem; nnyin inyene ndinam ñkpọ mbemiso Ọbọñ ọnọ nnyin se iyomde. Ke adañemi nnyin inamde udeme nnyin, Abasi anam Esie.

Ñkop-Uyo Ọbọ Utip

Mme asaña-utom edọñ mmọñ ke mme abañ-mmọñ eyọhọ kpa nte Jesus eketemede mmọ; se ndien nte mmọ edude ke mkpaidem ke ini mmọ ekoide wine kpa eti wine, emi ọfọnde akan se ekenọde isen owo ke eritọñ!

Ikọ ọdọhọ ete ke etubom usọrọ oro ikọdiọñke ọtọ eti wine emi okotode, edi mme asañutom ema ediọñ. Imonim ite ke mmọ ema etiñ enọ kpukpru owo emi ekedude do, edi Ikọ Abasi etiñ owut ete ke mbet ema enim ke akpanikọ. Nnyin imọfiok ite ke oro ebede, ke ini Jesus anamde mme utibe-ñkpọ, mme idiok-owo ikonimke ke akpanikọ, ikonyuñ inọhọ Enye ukpono.

Oro edi ukem-ukem se nnyin ikutde mfin. Ndsuk, owo ọdọdọñ, mme ada unan, ndien owo emi minimke Abasi ke akpanikọ eyedọhọ ete, “Edieke owo emi okopde nsọñidem, ami nyenim ke akpanikọ nte ke Abasi akanam oro;” edi ke adañemi ema ekenam utibe-ñkpọ oro, enye edidọhọ ndien ete, “Ikotimke idiok nte nnyin ikekerede.” Mme owo iyomke ndinim Jesus ke akpanikọ, ndien mmọ edomo ndinam ñkpọ eke mmọ ekekeme man etiñ ebiat utibe-ñkpọ eke enamde. Abasi ọnọnọ mme owo emi enimde Enye ke akpanikọ enyuñ ekponode Enye mme utibe eridiọñ.

Jesus emi nnyin inamde ñkpọ inọ ama anam ediwak mme utibe-ñkpọ emi owo mikemeke ndibat ke ini emi Enye okodude ke isọñ. John ama ọdọhọ ete, “Edieke ekpewetde mmọ kpukpru, etie mi nte kpa idem ererimbot ikpekemeke ndikọhọ se ewetde.” Nnyin ikot ke Mme Hebrew, “Jesus Christ etie ukem-ukem, mkpọñ, ye mfin, ye ke nsinsi.” Mme utibe-ñkpọ emi Jesus akanamde ke ini oro, ke esuk enenam mmọ ñko mfin ke otu owo emi enimde Enye ke akpanikọ. Nso utibe-ñkpọ ikpon ikan ndinyaña anam-idiok-ñkpọ nsio ke ata usuhọre itie nnyuñ nnam enye odu edisana ye edinen uwem ọtọñode ke usen oro aka iso? Idighe ọkpọsọñ ñkpọ inọ Anditiene-Christ ndinim ke akpanikọ nte ke Jesus ama anam mmọñ akabare edi wine.

Enam Ufọk-Abasi Edehe

Ekesinim usọrọ Nsaña-mbe ini kiet ke isua ke Jerusalem, ndien emi ekedi ini oro, usọrọ nsaña-mbe ekenyene ndidi edisana usọrọ, kpa ini emi mme Jew ekenyenede ndikere mbaña ata utibe erifak emi Abasi akafakde mme ete ete mmọ osio ke itie ufin ke Egypt ke ñkpọ nte tọsin isua iba mbemiso ini oro. Edi mme Jew ema eduok Spirit edisana usọrọ oro ke anyan ini ke edem, enyuñ ekabare eda enye enim usuñ ndikọ okuk.

Kiet ke otu edinam ke usọrọ oro ekedi ndiwa eyen-erọñ “eke ananade ndo onyuñ ananade ntọi.” Ikedighe mmem-mmem ñkpọ inọ kpukpru ufọk kiet kiet ndinyene oruk eyen-erọñ oro ke obio, ke ntre mme oku ema esibon oruk uduot emi ke edem efe-esop ke **Itie-ukpono-Abasi**, ekọrọ ye mme unam efen emi esidade enam mme uwa ke nsio-nsio ini ke isua. Mme ewet mbuk eset etiñ enọ nnyin ete ke mme ọsọñ-ido oku ema esisin mme ufene emi mme owo ekesidade edi man etuak ibuat enọ Abasi. Mmọ ebiaña ete ke ufene oro enyene ndo, ndien ekpuhọ enye, enyuñ ebọ okuk edian, enọ ndien enye emi mmọ edọhọde ke ọfọn ama. Mmọ eyemen ndien ufene emi mmọ ekesindesin enyam enọ owo efen emi edidide nte enye emi ọfọnde akan. Mmọ ekenam kpukpru emi ndikọ okuk.

Jesus ekedi “suñ-suñ ye ifure-ifure owo Nazareth” oro, ndien akananam Enye iyomke etop ye ukpono inọ Idem Esie. “Ke ini owo osuñide Enye, Enye isuñike mmọ usiene.” Edi adañemi Enye okokutde nte esuenede Ufọk Abasi, onyuñ okutde ido esuene emi mme anyam urua emi ekenamde, Enye ama adaha ada ke ifiopesit ebin kpukpru mmọ osioño, ye mme unam mmọ, onyuñ onuk ọduok okpokoro mme ọkpuhọ-okuk ọduok. Enye okofiori ete, “Ekunim ufọk Ete Mi ke ufọk mbubine.” Ewet ke Matthew ntem “Ufọk Mi eyekere ete, ufọk akam, edi mbufo emanam enye akabare edi itie mbon ñwo.” Oro owut nnyin nte ikpotimde inim ufọk Abasi ke edisana, mikponyuñ inamke ñkpọ ndisuene enye.

Edinen Ikpe Mme Mbọm

Owo ekpekeme ndikere ete, ye adaña ediwak owo emi ekedude ke Itie-ukpono-Abasi, mmọ ekpediana ọtọ kiet eñwana ye Jesus; edi ke adañemi ubiere-ikpe Abasi adade itie, baba ñkpọ kiet eke owo ekemede ndinam idikpanke enye. Ke usen akpatre ubiere-ikpe, mme idiok-owo eyeseme ekot mme ikpọ itiat ye obot ete eduọ efuk mme imọ man idibe ibọhọ iyaresit Abasi, edi ke usen oro, baba ñkpọ kiet iditreke ikañ iyaresit Esie. Idahemi Enye enyene mbọm onyuñ adahado ọnọ kpukpru owo eke esemede ekot Enye; edi ke ini usen mbọm Esie ama ebe, baba ñkpọ idikpanke edinen ubiere-ikpe Esie ndidoro anam idiok-ñkpọ ke idem.

MME MBUME

- 1 Emekere ete ke eka Jesus ama odori enyin ndikut Jesus nte anamde utibe-ñkpọ?
- 2 Nte mme asaña-utom ema ediọñọ andikanam mmọñ akabare edi wine?
- 3 Nso ke etubom usọrọ eketiñ abaña wine oro?
- 4 Nte Jesus ama ananam mme utibe-ñkpọ mbemiso ini emi?
- 5 Didie ke nnyin ikpakama idem ke esit Ufọk Abasi?